

內學第四輯第一種

大般若波羅蜜多經叙



大般若波羅蜜多經叙

大般若波羅蜜多經叙目次

卷一

五周叙事第一

舍利佛般若一

須菩提般若二

卷二

信解般若三

實相般若四

卷三

方便般若五

卷四

大般若波羅蜜多經叙目次

大般若波羅蜜多經叙目次

十義抉擇第二

諸經所繫第三

諸家所明第四

緒言第五



# 大般若波羅蜜多經叙卷一

叙曰。應學般若學。般若者。五度之目。萬行之鵠。三世諸佛之所自出。有母然後有子。有般若然後有世間人天。出世聖賢。般若者智也。智也者用也。用也者以空爲具。非以空爲事也。是故空有二義。非義不義無義之空。空亦應空。如義實義涅槃義之空。空則非空。般若之相無住涅槃。般若之行瑜伽巧便。般若之至無上菩提。是故應學般若學。以四門叙。一曰五周以叙事。二曰十事以抉擇。三曰諸經之所繫。四曰諸家之所明。而以緒言終焉。

## 五周叙事第一

一曰五周以叙事者。般若十六會。初有五會。義海全潮。有統有系。中有五會。河漢江淮。巨流時出。後有六會。六度各六。一度繫屬。全豹窺觀。應於初五。初雖五分。文異義同。詳

略文異。應爲三類。初分爲一類。文四百卷。是爲極詳。四五爲一類。但有四周而缺。方便世稱小品。道行四會是也。是爲極略。二三爲一類。具叙五周而缺。最後方便付囑。然秦譯詳。世稱小品。放光光讚二會是也。是爲酌中。最便研讀。今循二會。按文提系。談五周叙事。

此經五周說般若也。以經名智慧。舍利弗智慧第一。故初周佛詔舍利弗談菩薩智慧。談菩薩二諦。是爲最初。舍利弗般若。般若多說空義。須菩提好深行空法。又慈念衆生。故次周佛詔須菩提談菩薩三解脫門。談摩訶衍摩訶薩。是爲第二。須菩提般若。金剛能斷論云。欲令佛種不斷者。未成熟菩薩聞多福德於般若起信解。已成熟心入甚深義。已得不輕賤者。修多功德不復退轉。已得淨心。令大乘久住。本其意義。讀索此經。佛以帝釋久聞能記。許與問論。而談般若福德。令初發心。咸生信解。是爲信解般若。亦爲帝釋般若。佛於中含爲彌勒。授菩提記。又於此經爲彌勒說菩薩行。菩薩行佛所行。得亦無得。令已成熟入深般若。是爲入甚深般若。亦爲彌勒般若。合上二事。并爲一談。應



說爲第三信解般若。龍樹緣起論。此經爲說阿鞞跋致相故。爲說魔幻魔僞魔事故。爲說當來世人供養般若因緣故。佛爲顯示種種。令久修人功深不退。是爲第四不退轉地般若。亦爲實相般若。佛行即菩薩行。菩薩行者。妙於方便。境行果三。此周特勝。經之爲摩訶衍。人之爲摩訶薩。法之爲大菩提。亦於此周發闡無餘。是爲第五究竟地般若。亦爲方便般若。

### 舍利弗般若一

舍利弗般若者。般若是智慧。智慧一切相應。法中最勝。此經所明。是故應叙在經始。七事叙初。放光集衆。全經之所屬。亦此周之所繫。如是說序品第一。大乘義門。三性二諦。三性爲楞伽所詮。二諦則此經詳盡。三性二諦。名異義一。眞攝徧實。俗即依他。徧計簡盡。成實斯彰。曰不曰非。曰無。顯第一義。若說功德。則攝俗詮。夫能安住般若者。應以無所得方便而學。三乘無量無邊功德。非空之是歸。而菩提是趣。舟車必用。用歷山川。

是故佛爲略叙應學聲聞十種菩薩九種如來十三種功德事。若欲成就世出世無量無邊功德。當學般若波羅蜜。菩提不可至。求方便於空而可至。所謂功勳必賴經猷。作業必資作具。是故佛爲略叙世德佛德九十三種。皆須學於般若事。若能如是。諸天親供。梵行護成。全經之所屬。而此周之所繫。如是說歡喜品第二。大法旣重揭示。行果應續而談。觀照品者。般若之行果相也。行有其二。曰無著行。曰相應行。果有其一。曰授記果。且初無著行者。以二空故。不見人法境。不見修般若行。由不見故。不生執著。是爲能取空義。人自性空。法自性空。均空故。不離不異。不異則無。無一切法相。無生滅染淨相。是爲所取空義。所取空故。能取自空。能取空故。但有假名。如是而行。行故無著。是爲菩薩般若。以無著故。聲聞但空般若所不能及。以無著故。悲心入空。大作功德。聲聞不能。以無著故。行無所得。而有方便。聲聞不能。一次相應行者。一與空相應。二不見相應。三五不相應。與空相應者。蘊處界諦。支有無爲。及與七空。與空相應。法空不二。空中無法。應言與般若相應。不見相應者。不見六度三科。覺分佛道三解三際諸法相應。不見



一切智與如是諸法相應。不著有無倒解。不行諸有所爲。如是相應。應言與般若相應。如是智慧報得五利功。不思議。互不相應者。法與法。法與法界。法界與空。三科四諦。覺分佛道諸法與空。都不見其更互相應。應言與般若相應。如是相應。空應第一。授記不墮嚴土證覺。而亦不見。是爲最尊最勝。畢竟清淨。此般若相應菩薩有種種生相。三處來生佛處。沒往得妙方便。雖入靜慮而生佛世。爲度有情。生欲界人天。梵世。覩史。遊於一切諸佛國土。此般若相應菩薩有種種行相。利根頓證。自在入定。三乘度人。速久成佛。爲化有情。淨業斷趣。一度上首。隨趣擇嚴。相好致愛。根利不慢。以其所修不墮惡趣。常作輪王。不離十善。不起罪業。或復淨羸重業。淨菩提道。不著一切真趣菩提。成勝智淨五眼。引六通。又復能以互融六度。及與四攝。嚴淨一切智。一切相智道。而成正覺。菩薩如是功德最上最妙。菩薩如是功德智慧。一切聲聞但空智慧所不能及。一授記果者。三百苾芻。發無上心。佛記星劫作大幢相佛。六萬天子。彌勒授記。一萬有情。願生淨土。佛記成佛。號莊嚴王。若諸有情。般若相應。命終往生當生東方不動佛國。如是說觀。

照品第三。般若行果畧說已竟。舍利弗與目犍連須菩提大迦葉富樓羅等合掌同聲以三十一種名號稱揚讚歎般若波羅蜜。稱是菩薩最尊最勝具大勢力。能行無等等六度疾證菩提滿足功德。人天應禮。佛言如是。如是說無等等品第四。舍利弗般若竟。

### 須菩提般若二

須菩提般若者。般若以空爲用。用於功德。須菩提善空。故此有三門。初字空般若門。中字義般若門。後廣字空般若門。

未談三門。先應有叙。佛和大衆度於一切。答舍利弗問。已放光明。更爲餘人。命須菩提說空教誡。放光集會。於時會中。那庾多衆觀相發願。已悟無生。佛記作佛號覺分華。是爲此周開始序分。未入正宗所談三門。如是說舌相品第五。

初談字空般若門。是門亦二。曰字空。曰功德。曰三解。「字空者何耶。須菩提住空三昧



不見人法。一聞佛命教授菩薩。瞿然而驚云。何菩薩云何般若。佛爲述成。菩薩發心。乃至佛道皆畢竟空。都不可得。以如是教。卽般若教。卽所命教菩薩之教。所謂我蘊處界。內身外事三世諸佛皆不可得。譬如夢幻法假名假方便假。不應以四倒三解寂靜遠離雜染生滅而觀諸法。善達實相一切無著。便益六度入菩薩位。是爲第一章佛自教菩薩概略觀法。一如是空觀人或猶豫。佛卽反問須菩提。若法不空。頗有卽離諸法是菩薩不。頗有諸法增語四倒三解寂靜遠離雜染生滅是菩薩不。須菩提入深不疑。直答佛言。法性尙非有。卽離增語更何可言。菩薩假人又何可言。佛讚善哉。應如是學。非但菩薩見不可得。法界與法見亦不得。若入空中外法不得。心猶可得。卽便恐怖。都不可得更何憂悔。是爲第二章佛命須菩提教誠菩薩概略觀法。如是說善現品第六。功德者何耶。須菩提非惡取空。能作功德而善用其空。乃白佛言。若菩薩欲圓滿六度當學般若。欲徧知三科六大十二支當學般若。欲永斷三毒結纏暴流。取十不善道如是等等當學般若。欲修行禪空諸定覺分佛道如是等等當學般若。初品廣談當學。

此亦畧說當學。初品欲得而讚。此已聞味而讚。無般若方便法愛頂墮。有二十空觀正性離生。如實知三科六度禪空無量不應執。如實知菩提心無等等心廣大心不應執。是心非心本性清淨。於一切法無異分別。蘊至菩提應知亦爾。舍利弗言。善哉善現。離空解脫涅槃無門。三乘習空一切善巧。如是說入離生品第七。

三解者何耶。此三三昧。小以爲住。大以爲路。小以爲證。大以爲行。法一用異。說空是共義。亦是根本義。初空解脫。三門詮叙。曰謙讓門。不住門。明體門。謙讓門者。上品菩薩字不見。說法云何可能。此品菩薩字增減。不知不得。說法我當有悔。菩薩般若世法聖法。義無所有名。則無住亦非不住。非住不住。人法字空。云何教授教誠菩薩。復以異門破諸名字。所謂和合因緣二名。乃立夢幻影響。但誑耳目。若求一法實詮二名。徧一切中無處可說。云何教誠教授菩薩。於如是義不驚不怖。未得無生而已證其阿鞞跋致。不住門者。法愛難遣。已說重說。法即空故。不應住色。乃至菩提。若無善巧執法住法。不能修滿成一切智。又復不應攝受色。至菩提。本性空故。若能以空觀一切法。心無所行。

是則已得無所攝受三摩地門。作用無邊。聲聞不及。大乘經中種種說空。小乘經中亦種種說空。如勝軍梵志得隨信行。尙能於實相空中都無取捨。何況大乘辦一切業。不能於非相法中而無所著。一明體門者。審諦觀察。何是般若。何名般若。誰之般若。般若何用。於法無所有。不可得中。無可徵詰。般若乃至一切智智。都無所有。而不可得。由二十空故。若於空義不驚不怖。便於般若常不捨離。能如實知。法離自性。便於般若常不捨離。自性無性。性相互離。成一切智。無生無成。乃其所成。畢竟清淨。化生度情。如是說勝軍品第八。次無相解脫。空解脫門名無所攝受三摩地。無相解脫門名無所取著三摩地。行無巧便是行其相。住想勝解於法加行。不能解脫。生老病死憂悲苦惱。諸有所作皆不得成。行有巧便。不行於相。倒與不倒。定及非定。寂靜佛道。及其非相。一切不行。法卽是空。能成正覺。不取四句。不取不取。作用無邊。聲聞不共。云何不證。無上菩提。健行寶印百十五種。及餘無量。諸三摩地。深入其中。皆能證覺。不可執說。般若是空。三昧分別。兩不相涉。定慧與人。三無差別。菩薩入定時。不念證入。不作想解。皆無所有一



切不起。般若氣分乃在其中。如是無得是爲正學。我及諸法是其無得。無得無爲名畢。竟淨。如無所有如是而有名爲學法。愚不能了名爲無明。執著二邊。不離三界。不辦三乘。不信法空。不住六度。於一切法執著有性。是爲不學般若。云何能成正覺。必二十空無得方便。然後乃名正學般若。必學般若。然後乃成一切智智。如是說行相品第九。次無願解脫。一切種智心定相求般若。是爲有願有縛。如幻三摩地。無願解脫門。法卽是幻。幻無染淨生滅。云何能學般若能成正覺。於蘊中想立假人法。亦無染淨生滅。亦不學不成。菩薩若能如是修學。乃爲能學般若能成正覺。幻士五蘊無性爲性。二十空門不可得故。此如幻三昧。新趣菩薩。若有方便。善友攝持。不驚不怖。若無方便。惡魔侵害。有怖有驚。以應智智心。觀無常無我。苦空寂靜。相不可得。於諸聖道一切無著。名有方便。以無得方便。勸人趣菩提。名爲善友。離智修法有得有恃。名無方便。爲說六度文頌者。造不爲說。知魔幻佛形種種撓擾。令離六度。宣聲聞藏。汝無覺心不退。證覺一切不能。無我我所何用菩提。世無三乘。但樂聲聞。三解速證。涅槃樂易捨身苦難。一切諸

法實有可得。說如是事名爲惡魔。如是說幻喻品第十。

中談字義般若門。字空般若破假名字。字義般若不壞假名。非空即了。應續談義。作佛以菩薩始。菩薩以上首極。上首以大乘至。大乘以般若契。佛說法主。始說句義。鶩子善現智空第一。此經相應。次說句義。富樓羅者轉輪第一。轉大乘輪於此特最。後說句義。是故此門有四。曰佛說兩句義。曰舍利弗須菩提說摩訶薩句義。曰滿慈因摩訶薩轉摩訶衍義。曰摩訶衍即般若義。

佛說兩句義何耶。菩提薩埵。二既不生。句於其中理亦無有。故無句義。是菩薩句義。法說難會。喻說易明。十八種喻。喻句義無。非應不應。一相無相。當勤修學。應正覺知。於一切法皆非實有。所謂世善不善。有記無記。出世間法。有漏無漏。有爲無爲。共與不共。如是諸法無二無動。是菩薩句義。加是諸法無分別執著。是菩薩句義。當勤修學。應正覺知。摩訶薩者。三乘聖道大有情衆當爲上首。由彼已發金剛喻心。勝心大心。不傾動心。眞樂利心。常於此法愛樂欣喜。方便住空修諸聖道。住金剛喻勝三摩地。乃至虛空勝

三摩地。決定決定於大有情能爲上首。如是說譬喻品第十一。舍利弗須菩提說摩訶薩句義何耶。舍利弗以巧便說法。令諸有情斷我斷常。蘊處界諦乃至涅槃轉法輪。見名摩訶薩。須菩提則以欲證菩提發無上心無等等心不共聲聞心而不取著。異生聖佛蘊處界諦乃至不共。一切不生無漏平等。而有差別者。但隨俗施非第一義。以斯義故名摩訶薩。如是說斷諸見品第十二。

滿慈因摩訶薩轉摩訶衍義何耶。是亦三段。

第一滿慈以三事詮摩訶衍。曰被功德鎧。曰發趣大乘。曰乘大乘。被功德鎧云何。爲一切有情修行六度。拔一切有情於菩提涅槃。令一切有情滿無邊聖德。都無選擇亦無齊限。度各各別力小魔留。度度被六大軍海傾。又復與諸有情回向菩提。不取不得不著禪定。摩訶薩名徧十方界。發趣大乘云何。般舟爲父般若爲母。一切聖法般若所攝。般若產生結胎禪定。此談發趣應禪定始。菩薩修八禪空。起四無量。以無得方便與諸有情回向菩提。復以一切智智相應作意大悲爲首。依禪空無量修行六度。及修



念住一切聖法。普爲有情發趣大乘。摩訶薩名徧十方界。如是說六到彼岸品第十三。乘大乘云何。以一切智智相應作意大悲爲首。無得爲方便。雖乘六度而不得度輪。爲遣修故。修一切法。菩薩及法。但有假名。施設言說。不可得故。雖他方聞法。而無佛土想。雖應身隨順。而不離大乘。摩訶衍名徧十方界。如是說乘大乘品第十四。

第二佛與善現廣演三事。廣初一事而有四義。一者爲有其能義。能六度覺分。二十空門。十力三智。化度放光。如是等等。二者爲能如幻義。幻法無實。以是作大輪王六度教。衆於邪惡處示現同事。以是菩提作意大悲爲首。空爲方便。普立有情於諸聖法。而無所擇。三者不被爲被義。法相空故。功德相空。爲空而被鑿。人法造作。不可得故。功德不可得。爲不可得而被鑿。四者無縛無解爲被義。諸法本來無有遠離寂靜。無生滅染淨。是故十喻三時。善世有漏。諸五蘊等無縛無解。是故一切六度。二十空門。覺分。十力。菩薩行。一切智。真如菩薩。有爲無爲無縛無解。如是微妙。以無所得而爲方便。應如實知。應勤修學。應熟其情。應嚴其土。常不遠離。如是聖德。常作如是法事。是爲被無縛無解。